



PAENITENTIARIA APOSTOLICA

Prot. N. 426/15/I

B E A T I S S I M E P A T E R,

Salvator Gristina, Archiepiscopus Metropolita Catanensis, suas libenter faciens preces Agrippini Salerno, Parochi Paroecialis Basilicae Collegiate, sub tit. S. Mariae ab Eleemosyna, in oppido Catanensis Archidioeceseos, Alba Villa nuncupato, humiliter exponit mox millesimum quingentesimum expletum iri anniversarium, ex quo Anicia gente in Urbe natus est S. Placidus, inde a pueritia carissimus S. Benedicti discipulus, qui, prope Messanam die V Octobris DXLI, a Manucha pirata, pro Christi fide necatus est una cum fratribus, Eutychio et Victorino ac sorore Flavia, neconon Donato, Firmato diacono, Fausto et aliis triginta monachorum. Ad felicem memoriam rite celebrandam, in praedicta Basilica, ubi insignes S. Placidi reliquiae pie adservantur, a die XXI Iunii usque ad diem XXI Novemboris MMXV peculiares habebuntur sacrae functiones et varia spiritualia incepit, eo intento fine ut salutaris devotio erga caelestem Albae Villae Patronum promoveatur in fidelibus et, ipso auxiliante, eorum mores impensius divino Evangelio conformentur. Quo autem abundantius fidelibus, qui dictis celebrationibus intererunt, divinae gratiae thesaurus aperiatur, Exc.mus Orator Indulgentiarum implorat donum, ad instar iubilaei consequendum. Et Deus, etc.

Die XXVIII Maii MMXV

PAENITENTIARIA APOSTOLICA, de mandato Ss.mi Patris Francisci, *plenariam* largitur *Indulgentiam*, suetis condicionibus (sacramentali confessione, eucharistica communione et oratione ad mentem Summi Pontificis) a christifidelibus vere paenitentibus et caritate compulsis lucrandam, quam etiam animabus fidelium in Purgatorio detentis per modum suffragii applicare possint, si Basilicam Collegiatam S. Mariae ab Eleemosyna in forma peregrinationis inviserint, et ibi iubilaribus functionibus in honorem S. Placidi pie interfuerint, vel saltem, coram S. Patroni urna, per congruum temporis spatium, piis vacaverint considerationibus, concludendis Oratione Dominica, Symbolo Fidei, invocationibus B. Mariae Virg. ac S. Placidi.

Senes, infirmi, omnesque qui gravi causa domo exire nequeunt, pariter *plenariam* consequi poterunt *Indulgentiam*, concepta detestatione cuiusque peccati, et intentione praestandi, ubi primum licuerit, tres consuetas condiciones, si iubilaribus celebrationibus vel peregrinationibus se spiritualiter adiunixerint, precibus doloribusque suis vel incommodis propriae vitae misericordi Deo oblatis.

Quo igitur accessus, ad divinam veniam per Ecclesiae claves consequendam, facilior pro pastorali caritate evadat, haec Paenitentiaria enixe rogat ut Rev.mus Parochus prompto et generoso animo celebrationi Paenitentiae sese praebeat atque Sanctam Communionem infirmis saepe ministret.

Praesenti pro hac vice valituro. Contrariis quibuslibet non obstantibus.

Maurus Card. Piacenza
MAURUS Card. PIACENZA
Paenitentiarius Maior
Christophorus Nykiel
CHRISTOPHORUS NYKIEL
Regens



PAENITENTIARIA APOSTOLICA

Prot. N. 427/15/I

DECRETUM

PAENITENTIARIA APOSTOLICA, vi facultatum sibi specialissimo modo a Sanctissimo in Christo Patre et Domino Nostro, Domino Francisco Divina Providentia Papa tributarum, Excellentissimo ac Reverendissimo Domino Salvatori Gristina, Archiepiscopo Metropolitae Catanensi, benigne concedit ut, in millesimo quingentesimo anniversario, ex quo natus est hisce in terris Sanctus Placidus, Albae Villae Patronus, die pro fidelium utilitate eligendo, post litatum Divinum Sacrificium in Basilica Collegiata Sanctae Mariae ab Eleemosyna, impertiat omnibus christifidelibus adstantibus, qui vere paenitentes et caritate compulsi iisdem interfuerint sacris, **papalem Benedictionem** cum adnexa *plenaria Indulgentia*, suetis sub condicionibus (sacramentali confessione, eucharistica communione et oratione ad mentem Summi Pontificis) lucranda.

Christifideles qui **papalem Benedictionem** devote acceperint, etsi, rationabili circumstantia, sacris ritibus physice non adfuerint, dummodo ritus ipsos, dum peraguntur, ope instrumenti televisifici vel radiophonici propagatos pia mentis intentione secuti fuerint, *plenariam Indulgentiam*, ad normam iuris, consequi valebunt.

Contrariis quibuscumque minime obstantibus.

Datum Romae, ex aedibus Paenitentiariae Apostolicae, die XXVIII mensis Maii, anno Dominicae Incarnationis MMXV.



maurus Card. Piacenza
MAURUS S. R. E. Card. PIACENZA
Paenitentiarius Maior

christophorus Nykiel
CHRISTOPHORUS NYKIEL
Regens